

La sanadad en Grischun sut la marella

Ura da dumondas dal cussegl grond

■ **(anr/fa) Numerusas deputadas e deputads al cussegl grond han profità da la pussaivladad da far dumondas a la regenza. Las emprimas avevan da far cun il sectur da sanadad chantunal.**

Da l'onn 2013 ha preschentà la regenza grischuna in profil directiv per il svilup structural dal sectur da sanadad grischun. «Co è il stadi actual da l'implementaziun da quest profil directiv?», ha dumandà *Lorenz Alig* (pld, Glion) a cusglier guvernativ *Christian Rathgeb*. Il schef dal departament da giustia, segirezza e sanadad (DGSS) ha respus che la regenza constateschia en connex cun la fusiun dals furniturs da prestaziuns instituziunals grondas differenzas en las singulas regiuns.

Finamira cuntanschida en quatter regiuns d'ospitals

En las quatter regiuns d'ospitals Partenz, Val Müstair, Poschiavo e Bergiaglia è l'intent pli u main realisà: «En questas regiuns procura in'única organisaziun per la gestiun da l'ospital, la dmura e la Spitex. En quatter ulteriuras regiuns, Tavau, Engiadina Bassa, Engiadin'Ota e Surmeir è sper il center da sanadad activa anc in'ulteriura organisaziun portadra», ha ditg Rathgeb. En las ulteriuras quatter regiuns èn activas tranter tschintg e 26 organisaziuns portadras. «En in prossem pass prevesa il DGSS d'elavurar in sboz da consultaziun per stgaffir stimulsi finanzials da furmar in'única organisaziun portadra per regiun d'ospitals.» En la regiun d'ospitals Surselva ha la regenza la visiun d'in provedimaint da sanadad integrà analog a la Flury Stiftung en il Par-



Dals projects en il sectur da sanadad ch'èn vegnids realisads ils ultims onns cun success fa part era la Clinica Holistica a Susch. MAD

tenz, «damai cun in center da sanadad.» Quests centers pon, sco ch'il cusglier guvernativ ha cuntinuà, era dar impuls economics. Ch'il Center da sandà Engiadina Bassa haja stgaffì durant ils ultims diesch onns ulteriuras 60 plazzas da lavur grazia a novas purschidas, ha'l ditg, «la cumbinaziun da furniturs da prestaziuns cun da quels dal turissem ed ulteriurs partenaris, sco p.ex. la Claustra Mustér,

pon procurar per ina megliera occupaziun dal provedimaint da sanadad.»

«Quant bunas èn las perspectivas per il turissem da sanadad?»

La deputada *Christina Bucher-Brini* (ps, Cuir) ha menziunà la gronda concorrenza internaziunala en il sectur dal turissem da sanadad: «Experts sco *Jens Juszczak* da la Hochschule Bonn fan schi-

zunt quint cun ina stagnaziun u regress da quest sectur.» Ella ha dumandà a Rathgeb sin tge ch'i sa basia la supposiziun che quest martgà creschia anc. Ch'experts da la HTW a Cuir e da l'hotellaria grischuna prognostitgeschian in svilup positiv, «els discurran d'in martgà dal futur», ha ditg il schef dal DGSS, «quai mussan era progets realisads cun success ils ultims onns, sco p.ex. la Regiun da sa-

nadad, Regiun dal Parc Naziunal en Engiadina Bassa, u novas purschidas en clinicas existentas sco la Clinica Mentalva dals Servetschs psichiatric dal Grischun u clinicas novas sco la Clinica Holistica a Susch u la Clinica Gut a Fläsch.» Sco che Rathgeb ha menziunà sa referischa la stagnaziun dal martgà da sanadad sin il martgà russ, «causa la crisa economica e'l conflict da la Russia-Ucraina vegnan d'ain pazients en Europa dal vest.» Ch'era l'expert cità *Juszczak* saja da l'avis ch'il martgà da sanadad haja, «cun in marketing professional», bunas schanzas.

«Grond potenzial grazia a sias qualitads unicas»

A la dumonda da Christina Bucher-Brini tge che la regenza prevesa da far per ch'il martgà grischun saja abel da concurrer ha il cusglier guvernativ rendì attent al provediment da sanadad decentral, innovativ e da fitg buna qualitad en Grischun: «En cumbinaziun cun las purschidas turisticas en cuntradas natirales e culturalas intactas posseda il martgà da sanadad en Grischun gronds potenzials per crescer ed avair success.» La regenza è conscianta che la promoziun da quest martgà saja «in pensum pretensius e da lunga durada, tar la quala i sa tracta da sa posiziunar en nischas», ha ditg Christian Rathgeb e menziunà ch'i vegnia ad esser tar la realisaziun da las differentas purschidas dal martgà da sanadad grischun «ina via da pass pitschens». Per entant èsi tenor el anc memia baud per definir il products da nischa, «quels vegnan a sa mussar durant il svilup da la strategia en chaussa».